

Na osnovu člana 20. Zakona o početnom bilansu preduzeća i banaka ("Službene novine Federacije BiH," broj 12/98), člana 31. Zakona o privatizaciji preduzeća ("Službene novine Federacije BiH", br. 27/97, 8/99, 32/00, 45/00, 54/00, 61/01, 27/02, 33/02, 28/04 i 44/04), a vezi sa članom 12. Zakona o Agenciji za privatizaciju ("Službene novine Federacije BiH," br. 18/96 i 2/02), Upravni odbor Agencije za privatizaciju u Federaciji Bosne i Hercegovine donosi

PRAVILNIK O PASIVNOM PODBILANSU

Član 1.

Ovim pravilnikom utvrđuje se: način postupanja, nadležnost, odgovornost agencija i preduzeća, za predmete iz člana 2. Ovog pravilnika kao i prenos vlasništva, obaveza zaštite i formiranje registra nadležnih agencija i centralnog registra.

Član 2.

Predmet ovog pravilnika su:

- 1) stvari i prava sa pripadajućim kapitalom preduzeća iz člana 1. Zakona o privatizaciji preduzeća i privatiziranih preduzeća, koja nisu pod kontrolom te nisu bila uključena u aktivni podbilans, a nalaze na teritoriju država nastalih raspadom bivše Socijalističke Federativne Republike Jugoslavije (SFRJ),
- 2) potraživanja i obaveze nastale do 31.03.1992. godine, prema pravnim licima iz država nastalih raspadom bivše SFRJ.

Član 3.

Predmeti iz člana 2. ovog pravilnika prenose se na nadležne agencije za privatizaciju kod:

- 1) potpuno privatiziranih preduzeća danom izdavanja Rješenja o izvršenoj privatizaciji, i
- 2) dijelom privatiziranih preduzeća kod kojih je u ukupnom kapitalu učešće privatnog kapitala iznad 50%, plus jedna dionica, danom izdavanja Rješenja o izvršenoj privatizaciji.

Član 4.

Nadležna agencija za privatizaciju, u saradnji sa drugim nadležnim organima, pokreće aktivnosti u skladu sa pozitivnim zakonskim propisima u cilju osiguranja pravne zaštite predmeta iz člana 2. ovog pravilnika.

Član 5.

Nadležna agencija odgovorna je za: evidentiranje, ažuriranje, istraživanje i prikupljanje dokumentacione osnove za predmete iz člana 2. ovog pravilnika.

Organizaciona jedinica/odjel za pasivni podbilans nadležne agencije za privatizaciju dužna je za predmete iz člana 2. ovog pravilnika osigurati potrebnu dokumentaciju za pokretanje postupaka kod nadležnog ministarstva/organa koji vrši/lo ovlasti upravljanje kapitalom u cilju naplate potraživanja, prenosa i uknjižbe vlasništva nad nekretninama i ostvarivanje drugih vidova zaštite.

U skladu sa stavom 1. ovog člana, nadležna agencija obavezna je izvršiti analizu pasivnog podbilansa i ostale potrebne dokumentacije svakog preduzeća iz člana 1. Zakona o privatizaciji preduzeća kao i preduzeća koja su privatizirana, a po potrebi imenovati radna tijela koja će vršiti dodatna istraživanja u cilju prikupljanja podataka za predmete iz člana 2. ovog pravilnika.

U cilju sprečavanja zastare potraživanja iz pasivnog podbilansa moraju se evidentirati po ročnosti odnosno dospelosti na naplatu.

Nadležna agencija obavezna je formirati registar predmeta iz člana 2. ovog pravilnika.

Član 6.

Preduzeće i lica koja su ovjerala/potpisala program privatizacije i početni bilans za privatizaciju odgovorna su za neiskazivanje predmeta iz člana 2. ovog pravilnika, za koje se naknadno utvrdi da su trebala biti iskazana.

Preduzeća su dužna staviti na raspolaganje nadležnim agencijama sve podatke i dokumentaciju vezanu za predmete iz člana 2. ovog pravilnika.

Ukoliko se utvrdi stanje iz stava 1. ovog člana i nepostupanja u skladu sa stavom 2. ovog člana, nadležna agencija u saradnji sa pravobranilaštvom Federacije BiH / Kantona može pokrenuti

inicijativu za utvrđivanje odgovornosti pravnih lica i lica potpisnika programa i početnog bilansa.

Član 7.

Nadležno ministarstvo/organ koji vrši/lo ovlasti upravljanje kapitalom u saradnji sa nadležnom agencijom dužno je izdati rješenje o prenosu vlasništva u skladu sa zakonskim propisima iz ove oblasti za predmete iz člana 2. ovog pravilnika za preduzeća iz člana 3. ovog pravilnika na Federaciju ili Kanton, zavisno od ovlaštenja upravljanja kapitalom u predmetnim preduzećima.

Akti iz stava 1. ovog člana su osnova za uknjižbu vlasništva nad predmetima iz člana 2. ovog pravilnika kod nadležnih organa i institucija država nastalih raspadom bivše SFRJ.

Član 8.

Ovim pravilnikom utvrđuje se obaveza Agencije za privatizaciju u Federaciji BiH (Agencija) da u okviru svoje djelatnosti:

- 1) prati, nadzire i koordinira provođenje odredaba ovog pravilnika, te pruža savjetodavnu pomoć,
- 2) formira i vodi centralni registar Federacije BiH za predmete iz člana 2. ovog pravilnika,
- 3) utvrdi oblik i formu centralnog registra.

Kantonalne agencije za privatizaciju obavezne su u elektronskoj i pisanoj formi dostavljati Agenciji, podatke koji čine sastavni dio centralnog registra.

Član 9.

Ovaj pravilnik stupa na snagu narednog dana od dana objavljivanja u "Službenim novinama Federacije BiH"